

GEREJA KRISTEN PROTESTAN INDONESIA (GKPI)
JEMAAT DAME Dr. IL. NOMMENSEN
RESORT SAIT NIHUTA

Tata Ibadah Minggu Rogate, 09 Mei 2021

01. Marende BE. 3:1-2, “Puji Jahowa Ale Tondingku
02. Votum / Introitus (U: Uluan; R: Ruas)
- U : Dibagasan goar ni Debata Sama, Anak, dohot Tondi Parbadia
- R : Amen
- U : Marsoara olopolop ma hamu paboahon, patubegehon hata i! Pasar hamu ma i ro di ujung ini tano on, dok hamu ma:
- R : Nunga dipalua Jahowa naposoNa si Jakob. Marolopolop tu Debata ma, ale sandok tano on!
- U : Endehon hamu ma hamuliaon ini Goarna, marmulia ma bahen hamu pujipujianNa. HALELUYA
- R : *Mangendehon: HALELUYA*
- U : Martangiang ma hita ... Ale Dabata, Ama Pargogo na so hatudosan, nunga dilehon Ho hataM tu hami, asa marhite hataMi taruli hami di hangoluan na salelenglelengna. Na mangido ma hami tu Ho, sai lehon ma tu hami gogo, habaranion laho mamaritahon dohot papatarhon Barita na Uli Haluaon i marhite hata dohot pambahenannami. Togihon jala ajari ma hami, asa mangolu hami hombar tu lomo ni rohaM, asa lam tu ulina parsorannami na pinasahatMu tu hami jala asa marparbue na godang hami laho pasangaphon Ho, di bagasan AnakMu, Tuhan Jesus Kristus, Tuhan jala Sipalua hami. Amen
03. Marende BE. 232:1, “Sian Sude Parulian na Arga”
04. Epistel: 1SAMUEL 1:9-18
(Dung dijaha ayat 18, marudut ma muse tu na di toru on)
- U : Martua ma angka na umbege hata ini Debata dohot na umpeopsa
- R : Amen

05. Marende BE. 161:1-2, "Tangihon Anggukangkukkon"

06. Tangiang Manopoti Dosa

U : Andorang so tatopoti dosanta di adopan ini Debata, jumolo ma hita martangiang na hohom di jolo ni Debata (*tangiang na hohom*)

Ale Debata, Amanami Pargogo na so hatudosan jala Parholong roha! Ro do hami tu adopanMu manopoti jala manolsoli saluhut dosanami. Sian hatutubunami, nunga marlaok dosa hami, jala ndang adong na sintong di bagasan rohanami, gabe tudondonghami do dalan na lilu i, i ma na mangalaosi uhumMi. Alai na manolsoli do hami jala hupasahat hami ma tu Ho saluhut hadirionnami, alai porsea situtu do hami, Ho do Tuhan Parasirhoa na sumurung jala Parholong roha. Ndang dihalomohon Ho hami mago, gabe dilehon Ho di hami hasesaan ini dosa dohot hangoluan na imbaru ala holong ini AnakMu na manongtong i, Tuhan Jesus Kristus, Sipalua hami. Amen

Laos tabege ma bagabaga ni Debata taringot tu hasesaan ini dosanta Ai songon on do holong ni roha ini Debata di portibi on, pola do AnakNa na sasada i dilehon, asa unang mago ganup na porsea di IBana, asa hangoluan na salelenglelengna di ibana.

Hasangapon ma di Debata na di ginjang

R : Amen

07. Marende BE. 516:1-2, "Bege Joujou ni Jesus"

08. Togutogu tu ngolu na imbaru: MIKA 7:5

(Dung dijaha togutogu tu ngolu na imbaru i, marudut ma muse manjaha na ditoru on)

U : Antong rap ma hita martangiang, mangido gogo tu Debata laho mangulahon na hombar tu hataNa i.

R : Ale Tuhan Debata, pargogoi ma hami mangulahon na hombar tu hataml. Amen

09. Marende BE, 403:1, "Pos Rohanku di Tuhanku"

10. Manghatindahon Haporseaon

11. Tingting / Tangiang Pangondianon

12. Marende BE. 25:1-2, "HataMi Ale Tuhanku"
 13. Jamita: 1JOHANNES 5:1-5
 14. Marende BE. 216:2, "Gargar Dolok Tapor Batu"
 15. Ayat Pelean: MATIUS 8:4
 16. Tangiang Pelean
 17. Ende Pelean, BE. 299:6, "Debata do Manggomgomi"
 18. Tangiang Ale Amani
(Molo ndang adong partohonon na manguluhon parmingguon, rap mandok ma sude ruas di tangiang "Ale Amanami". Alai molo partohonan do manguluhon, hombar ma tu hasomalan parmingguon di gareja)
 19. Doksologi: "Ai Ho do nampuna harajaon ..."
(sude ruas mangendehon molo na manguluhon parmingguon angka partohonan)
 20. Amen – Amen – Amen
-

Jamita:

TANGIANG INI ANGKA NA PORSEA

Digoari ma minggu sadari on, *Rogate*. Di bahasa Batak, lapatan ni **Rogate**, ima **martangiang**. Jotjot do tabege pandohan, hosa ni haporseaon ima tangiang. Hombar tu pandohan i, tangiang ndang holan na mangido sipangidoan tu Debata; alai tangiang i do na manambori dohot pangoluhon haporseaon. Molo ringkot matoras haporseaon, girgir ma hita martangiang. Ima lapatan ni pandohan na di ginjang i.

Saonnaari, masuk ma jolo hita tu hatorangan ni turpuk on. Pandapot ni angka na malo taringot tu surat 1Johannes on ima laho mangadopu angka pangajarion na maralo tu hakristenon, isarana: *gnostisisme* dohot *doketisme*. Dang dijalo pangajarion *gnostisisme* dohot *doketisme* na Debata do Jesus. Didok nasida, holan na jolma do Jesus, dang adong di Ibana hadirion ni Debata. Mangalo pangajarion na songon i, dipatolhas ma surat 1Yohanes on tu huria na adong di Asia Kecil. Laos i do panghorhonna umbahen na disurathon di pamuhai ni turpuk on pandohan, "Ganup na porsea, Jesus do Kristus, i do naung tubu sian Debata" (ayat 1).

Turpuk sadari on manggogohon aha do hadirion ni hakristenon. Sada do ojahan na hot di hakristenon, ima porsea na Jesus do Kristus, na Debata do Ibana naung paluahon jolma sian gomgoman ini hamatean. Molo meolmeol do haporseaon ni sada halak sian i, dang targoar be ibana gabe Kristen. Alai dang olat ni do pe. Haporseaon tu Kristus ingkon tarida do i sian parbue ni ngolu, ima mangulahon dohot mangaradoti patikNa i (ayat 3).

Saonnari, tubu ma sungkunsungkun, aha do gogo di hita laho marhaporseaon tu Jesus huhut papatarhon patikNa di portibi on marhitehite parulaonta? Markus 14:38 mandok, “Dungo ma hamu jala martangiang, asa unang bongot hamu tu bagasan pangunjunan; ai na girgir do nian tondi i, alai gale do ia daging” Molo tabereng hatorangan na di ginjang i, haporseaon dohot parbuena ima mangaradoti dohot mangulahon patik ni Debata, ndang holan di partondion alai sahat do tu pardagingon. Lapatanna, haporseaon tu Jesus ingkon tarida ma i sian patikNa na patar di bagasan ngolu pardagingonta.

Dison ma panghorhon ni tangiang. Dipamuhai ni jamita on nunga dipasahat, tangiang dang holan na mangido sipangidoon sian Debata. Sada na so boi lupahononta, tangiang i do manambori partondionta dohot mangalehon gogo tu pardagingonta asa hot marhaporseaon tu Jesus jala pataridahon rumang ni patikNa di portibi on marhitehite ngolu pardagingonta. Jala hombar muse ma i tu na tarsurat di Markus 14:38 uju dipaingot Jesus angka siseanNa, asa unang maninggalhon ngolu si partangiang.

Jadi molo dipatorang nangkin, hadirion ni halak Kristen ima hot marhaporseaon tu Jesus. Asa hot marhaporseaon tu Jesus, halak Kristen dang boi tarsirang sian tangiang. Alani, marhitehite turpuk sadari on, disungguli ma hita asa marsiajar gabe halak si partangiang. Songon didok di BE 487:3, “ Imbaru panghirimon nang hagogoon i Margogo, marsahala do partangiang i. Togu muse langkana lao marjamita i, ai Kristus do donganna di ulaonna i” Alani, gabe ngolu si partangiang ma hita anggiat lam hot haporseaonta tu Jesus jala patikNa i patar marhitehite ngolu pardagingonta. Amen. (IH).